

no. 7


LE TRIOMPHE
DE LA PAIX,
FAICTE ENTRE LE
ROY ET NOSSEIGNEURS
LES PRINCES.



A PARIS,

Chez CLAUDE COLLET, rue Saint Jacques, au
Mouton blanc, près le Plessis.

M. D. C. XIV.





LE TRIOMPHE DE LA PAIX, FAICTE ENTRE LE ROY ET NOS SEIGNEURS LES PRINCES.



EVLE François, mes chers compatriots, mon ambition n'aspiroit à rien moins qu'à te faire entendre le sujet de ta consolation & la mienne, cognoissant combien ceux qui laissent aller quelque chose à la veüe du public sont sujets aux censures & calomnies des enuieux mesdisans, & encore plus particulièrement des ignorans, lesquels pour la pluspart franchissans trop librement les bornes de leur profession, veulent d'une impudente & impudique langue, violer & prophaner les chastes intentions des bons & naturels François. Et ne se tiennent pas contens de gloser indiscrettement les parolles de ceux qui mettent la main à la plume, si par vne outrecuidance trop effrontee ils n'en venoient au point de paraphraser sur leurs imaginations & interpreter sinistrement & deshonestement leurs plus entieres affections: festimans par les poinçons de telles mesdisances se graver vn renom immortel dans le blasme d'autrui. Mais ne me souciant beaucoup de telle maniere de gens, j'ayme mieux plaire aux autres, & principalement à ceux qui sont releuez du nombre

2

des ennemis de la paix, laquelle maintenant triomphe au dessus de la guerre.

C'est vne maxime soustenuë de tous que d'un heur non attendu, les ioyes qui procedent & naissent de l'aduenement d'iceluy sont ordinairement plus grandes que n'en estoit l'esperance auparauant conceüe. Toute la France, par cy-deuant espouuentee & troublee sur l'apprehension d'une guerre civile n'esperoit rien moins que la iouissance heureuse de la paix: de laquelle maintenant les amoureux effects doucement nous halennent des aisles de leurs doux & agreables Zephirs: de telle sorte & maniere qu'a present s'offre & se represente le temps auquel reuiuent les affections languissantes des iuyets, les mortes resuscitent, les vieilles rajeunissent, les foibles se fortifient, & celles qui durant ces troubles, ce semble, s'en alloient mourir, s'immortalisent au seruice du Roy. Point tant n'estions-nous estonnez que les meschans & seditieux personages ayant suiuy leur coutume ordinaire de dire & vouloir faire mal, mais bien à craindre & dangereux seroit-il pour l'interest du public, s'ils estoient creuz des gens de bien, & particulierement des Princes, colonnes & bouleuers assurez d'un Estat, lesquels scauent fort bien destourner & chasser les mouches de leur visage, mais non pas les flatteurs de leurs oreilles, semblables aux chiens d'Acteon, qui portent & renuersent dans le goulphe du mal-heur ceux qui se laissent charmer par le sifflement de leurs pestiferes & pernicieuses langues, dissimulez truchemens de leur mauuaise intention. Qu'ils considerent cecy, & qu'on leur demande en conscience s'il n'est pas veritable que la seule passion, qui possede leur ame, aueuglant leur cognoissance & raison, leur interdit la iouissance du bien & vsu-fruict de la paix, que la reconciliation de

nos Princes apporte presentement à la France. Ils ne se fussent contentez d'auoir rauy les brebis du Berçail, si par les mesmes efforts de leur occulte malice, ils n'eussent tasché de donner la chasse aux chiens fidelles qui crient, abboyent, espient & descouurent leurs ruses & secretes menees. Combien sont criminels de leze-Majesté, telle maniere de gens qui dissimulans le bon conseil à leur Roy pour faire entrer de mauuaises impressions dans l'ame genereuse des Princes? Vn bon François n'en peut discourir qu'avec passion. Quand on les à estimez loing ils sont prés, & quand on les pense prés ils sont loing, & se trouuent partout aux espies, aux escoutes, en intention de troubler, changer, alterer, ruiner, destruire, corrompre, seduire, peruertir, & desraciner la paix, le repos, la fidelité, l'obeissance, le ioug, & la subiection que les vrais sujets doiuent à leur souuerain Monarque.

Quant à vous, tres-honorez Princes, vous auez iugé de leur inclination naturelle, qui ne se tourne que du costé du mal, les preuues vous en sont apparentes: voilà pourquoy n'ayans abandonné vostre creance à leurs persuasiues parolles, vous estes heureusement pour nous, entrez en vn traicté de paix, à la consolation de tous les sujets du Roy & des vostres. La fortune qui se rit des mutations & changemens des Empires & Estats, à, comme vaincuë & surmontee, ceddé aux effects de vos magnanimes courages, & tant de malheurs desquels elle menaçoit vos personnes & les nostres, que vous auez sagement preueus, ont faict perir en vous tout le desir & l'enuie que vous eussiez peu auoir d'ouurir la porte à vne guerre ciuile: de maniere qu'assurant vostre constance, & vos resolutions à la paix, vous auez par ce moyen destourné les flots impetueux de de tant de calamitez, que la guerre ordinairement a-

mene quant & soy. Car à quoy seruiroit de troubler le
 Royaume pendant la minorité du Roy ? tousiours la
 cause des mineurs est iuste & recommandable il ny a
 rien de plus dangereux ny ruineux que d'attaquer vn
 Roy mineur: chacun le veut deffendre & tenir son par-
 ty, & tousiours ont le tort ceux qui ont quelque diffé-
 rent à desmesler avec de semblables parties. Il ny a
 Monarque en toute la Chrestienté qui aduertý de ce
 qui s'est passé, n'ait offert à nostre Roy mineur, tout
 secours, ayde, force, & moyens pour le deffendre &
 maintenir en son droict & Estat, l'Empereur par l'en-
 tremise de son Ambassadeur luy a faict cognoistre le
 desir qu'il a de le secourir au besoing. Le Roy d'Espa-
 gne de mesme, autant de leur costé en ont faict, le Roy
 de la grand' Bretagne, le grand Duc de Florence, la
 Serenissime Republique de Venise, son Altesse de Sa-
 uoye, & tous les Potentats d'Allemagne: esperans
 quelque iour receuoir de luy la mesme faueur, selon
 l'occurrence des affaires qui pourroient arriuer en leurs
 Estats. pendant la minorité de leurs hoirs & succes-
 seurs. Mais qu'eust-il esté besoin d'emandiquer le se-
 cours estranger, en ceste affaire, la France n'a-elle pas
 assez de puissance, ny les brachs assez longs pour em-
 pescher & arrester les vains efforts de ceux qui la vou-
 droient reduire encore vne fois au mal-heur d'une
 guerre ciuile: Il ny a ville ny bourgade dans le Royau-
 me, qui n'ait assuré le Roy de son obeissance, il ny a su-
 jet en toutes les prouinces qui ne proteste le mesme:
 ce n'est plus à present comme au temps passé, que les
 peuples mutinez suiuiuent ordinairement le party
 d'eux le plus affectionné: tous aiment leur Roy, &
 veulent viure en le seruant, & mourir pour la deffence
 de sa cause, ainsi que vous desirez faire, tres-honorez
 Seigneurs, ô qu'il vaut donc beaucoup mieux en paix

viure librement & sans crainte avec peu de chose, que d'estre parmy les hazards de la guerre, esclaves de la fortune, avec beaucoup de biens.

Durât la guerre le destin suit les plus puissans Monarques pas à pas, aussi bien que les moindres & plus petits soldats, s'embarque quant & eux, le danger monte en croupe derrière eux & la crainte ou apprehension d'une finale misere ne les laisse & ne les abandonne, ny plus ny moins que l'ombre faict le corps. Mais durant l'amiable saison de la paix, chacun vit en liberté, liberté toutefois qu'il faut recognoistre appartenir au Prince, qui l'a tient pour ostage de la foy que luy deuons garder. Durant la guerre les riches deuiennent pauvres, durant la paix les pauvres deuiennent riches : Durant la guerre les peres enseuelissent leurs enfans : Durant la paix les enfans enseuelissent leurs peres : Durant la guerre naissent les nouveaux impôts, les nouvelles leues de deniers, subides, collectes & emprunts tant pour l'entretien des armées & garnisons des villes, que pour les nouvelles fortifications des places & forteresses : mais durant la paix toutes ces choses cessent, tous edicts, ou ordonnances commissions, charges & mandemens, faicts à ce suiet, n'ont plus de lieu, & ny a que la simple & ordinaire recognoissance des suiets enuers le Roy qui a son cours comme deuant. Durant la guerre les choses grandes diminuent : & durant la paix les petites croissent & deuiennent grandes. Durant la guerre les loix sont mesprisees & ne se peut la voix d'icelles entendre parmy le bruit & cliquetis des armes : là ou durant la paix, elles sont estroitement & inuiolablement obseruees. Mais ie vous prie, considerons vn peu les maux, qui eussent prins naissance, en ceste guerre si par la diligence de nostre Royne, & prudence de nos Princes, il n'eust esté remedie promptement.

ment à ce mal qui s'en alloit croissant may qu'on aye fait, on n'a peu faire ny empescher que le bruit de ceste émotion gallicane n'ait prins sa vollee iusques aux terres & prouinces des barbares infidelles, mal d'angereux pour toute la Chrestienté. Chacun scait combien la valeur des François est redoutée du Turc, il scait fort bien se preualoir des occasions que le temps & la fortune fauorablement luy presentent: voila pourquoy, sur ce nouveau bruit de la guerre ciuille parmy la nation François, il s'est voulu ayder seruir & preualoir de la fortune qu'il pensoit desia tenir en main, il a assemblé sur cette assurance, toutes ses forces pour se ietter à bon escient sur la Hongrie, en intention d'en d'espoüiller entierement l'Empereur discourant à part soy & faisant son compte que la France retenuë en ses mutinatiōs ciuiles ne pourroit contre ceste sienne entreprise, enuoyer ayde, force & secours au tres inuincible Mathias, c'est l'vne des plus grandes ruses desquelles ordinairement il se sert, quand il veut assaillir vne prouince: Voila le premier malheur qu'eut apporté à la Chrestienté la guerre ciuille des François.

Le second, par ce tumulte ciuil on eut mis & abandonné le Royaume en proye, & en hazard d'estre enuahy par ceux, qui comme loups apres auoir deuoré les brebis, taschent par toute sorte de malice couuerte de faire destruire l'vn l'autre & ruiner les chiens qui anciennement ont abbayé apres & souuentefois mordu, battu en fuyans & donné la chasse iusques en leurs propres tannieres.

Le troisieme, la guerre ciuille, donne suiet à plusieurs qui espient telles occasions, de se rebeller ouuertement contre le Prince, en intention de s'agrandir, de s'auancer aux charges & dignitez, & assouuir leur

insatiable

insatiable auarice par eux preferée au repos general du Royaume, cōme sont plusieurs coquins gens de basse cōditiō, se voyās supportez de quelques nobles, cen'est parler que des choses que l'incōstāce des tēps nous ont fait cognoistre, durant les anciēnes guerres ciuiles. Le quatriesme pour l'entretien de telles armees ciuiles on emandique & a on recours, tāt d'vn party que d'autre, aux forces, aydes & secours des voisins estrangers, qui souuentefois s'en retournants mal traitez & recompensez, prennent de là suiet & matiere de nous faire à bon escient la guerre, qui est cause que de Sylla nous tombons en Caribdis, c'est à dire que pensans auoir faict avec les nostres sans y penser nous vient sur les brachs vne guerre à demesler avec l'estranger. Cecy soit dit sans faire enumeration des autes malheurs que produisent les guerres intestines d'vn Royaume, comme sont le mespris des loix, l'oppression des Magistrats, la destruction des Citez, le bouleuersemēt des chasteaux, citadelles, forteresses, l'accagement des Palais, la tyrannie des soldats, l'iniustice des Chefs & Capitaines, la destruction des Temples & lieux sacrez, la demolition des maisons de plaissance, les meurtres des suiets, la rançon des captifs la defloration des Vierges, les des-honneur des femmes, les larcins, volleries, pilleries, brigandages, picorees, detroussemens & deualisations de marchands, & autres milles malheurs qui suivent ordinairement la guerre & la reuolte ciuile.

Vn Royaume est comme vne Cité, de laquelle tous les suiets du Prince, de quelque rang & dignité puissent ils estre, sont citoyens: voila pourquoy s'il est ainsi, comme disoit le grand Scipion, qu'il vaudroit mieux renuerfer par terre mille ennemis estrangers que de faire mourir vn seul Citoyen: Iugeons de là

combien sont cruelles les guerres ciuiles qui encouragent les Princes d'ensanglanter leurs mains dans le sang de leurs concitoyens. Otho Syluius Empereur de Rome renommé pour le plus debonnaire Prince de tous, voyant qu'un iour luy fut donné le choix, ou de quitter l'Empire en mourant, ou le conseruer & defendre par la grande effusion de sang des citoyens Romains, ayma mieux mille fois mourir en quittant le sceptre & la couronne Imperiale, que de voir le sang des siens deuant ses yeux cruellement espanché. Et comme il fut supplié de ses amis de ne coniecturer vne si soudaine issue de la guerre, & ne desesperer de la victoire: dict qu'il ne vouloit pas que sa vie fut la source & naissance d'une guerre ciuile, ô Princes, où estes vous, voyez l'interest d'une Republique preferé à la vie d'un Empereur, n'admirez vous point le courage & la generosité d'un tel Monarque amateur de sa patrie? Vous estes Princes Chrestiens, ie vous souhaite autant de constance & de resolution à pacifier vos differents ciuils, qu'auoir ce Prince payen aagé de trente trois ans seulement à mourir pour la conseruation de la paix entre ses peuples & concitoyens. Que seruēt nos grâdeurs, à quoy tendēt nos ambitiōs, tant de fast & de luxe ne peuvent suffire pour l'acquisition d'une gloire immortelle, tant de richesses, & despoüilles tant de trophées d'ennemis surmontez ne peuvent pas nous exempter de la tombe, de toutes ces choses nous n'en pourrons finalement remporter qu'un tres-amer & tres-aigre repētir, de toutes les victoires du mōde, de toutes les cōquestes d'Alexādre, vous n'ē pourrez posseder finalement ny plus ny moins que luy que cinq ou six petits pieds de terre, & n'y aura que vostre seule vertu approuuee du ciel, & admiree des hommes, qui, exercee en la iuste & legitime defence du Roy & de la

patrie, pouffera l'infiny de vos triumphes dans la vou-
 te des cieux, nous voyons toutes les richesses mondai-
 nes fondre à la longue dans ce grand ocean de la mort.
 Pour l'interest particulier les villes sont bandees les v-
 nes contre les autres, c'est la peste de la focieté ciuile,
 c'est l'eau de depart qui des-vnit les freres, voire sepa-
 ré le Pere d'avec les enfans. Saladin le plus excellent de
 tous les Princes d'Egypte & le plus oppulent Monar-
 que de son temps, quoy que l'estendue de sa puissance
 & de son pouuoir eut outrepassé la Syrie & la Palesti-
 ne, se voyant proche de la mort recommanda par té-
 stament qu'iceluy estant mort, pour toutes pompes
 & Ceremonies funebres, fut seulement portee deuant
 son cercueil sa chemise de lin au bout d'une lance, &
 que celuy qui la porteroit criast continuellement aux
 oreilles de tous les suiets, ceste seule Tunique est ce
 qui reste à l'Empereur de toutes les richesses, triom-
 phes, uictories & trophées qu'il a remportees durant
 sa vie, voix digne d'un tel Monarque qui deuroit estre
 souuent repetee de tous nos Princes Chrestiens, qui
 par la trop grande abondance des biens de la terre se
 rendent le plus souuent necessiteux des richesses du
 ciel : il est tres-difficile d'amasser de grands biens par
 la voye ordinaire des guerres & demeurer en les a-
 massant grand homme de bien, la seule foy promise à
 Dieu, & en apres au Prince, estant inuiolablement
 gardee, avec toutes les circonstances requises, peut
 faire produire la renommee d'un Grand ez siecles eter-
 nels. L'exemple de la vertu des autres est vn gage à la
 nostre, la louange de leur fidelité a la conseruation
 d'un Estat & repos public d'un Royaume, est vne ex-
 hortation à leur ressembler : & pource puis que
 les peres de nos illustres Princes ont tellement si-
 gnalé leur vertu en tant d'endroits, que toutes les pro-

vinces de France portent encore les marques de leurs honneurs, qu'ils facent en ceste ressemblance que toutes leurs actions marchent tousiours au compas de la raison, & que d'oresnauant ils n'ayent rien au monde de si doux que de tesmoigner au Roy & a tous ses suiets qu'ils sont les vrays protecteurs de son Estat, & naturels ennemis des perturbateurs du repos public.

Je croy en assurance que nulle mutation ne pourra en façon quelconque arriuer en leurs resolutions dernieres a la paix, prinſes avec tant de ſoing, prudence & iugement, comme eſtans ceux qui iamais n'ont eu dans l'ame autre deſſin de faire ſeruice au Roy que ſelon les loix de l'honneur : car comme ce ſont des courages nobles & releuez, auſſi leur deſſeins ne volent pas tousiours en l'air, ils ont en quelque but louable & final en leur premiere reſolution qui eſt la reformation de l'Eſtat au legitime contentement de leurs Maieſtez & de tous leurs bons & naturels ſuiets : leurs lettres, parolles & reſponces, conceuës par l'honneſteté & prononcées par la modeſtie, teſmoigneront a iamais à l'opposite de tout ce qu'on pourroit croire, qu'ils ſont naiz à l'honneur, n'ont point de ſouhaits plus ardans ny plus ordinaires que de pouuoir ſacrifier leur vie à la premiere occurence où il ira du ſeruice du Roy, de la conſeruation de la paix & repos de ſon Estat: l'eſclat de leurs belles & vertueuſes actions ſur les preuues de leur fidelité & particulieres affections au bien de leur Monarchie, reialliera de leurs conſciences à la veuë non ſeulement des peuples de la France,

mais encore a la cognoissance des nations estran-
geres parmy lesquelles leur reputation est co-
gneüe, & leur courage glorieusement loüé prouvé
& admiré.

F I N.

